

Stichting Monumentenfonds Aruba

A firma 'Letter of intent' pa cumpra Huize Veneranda



ORANJESTAD – Ayera den oranan di mainta a tuma luga e firmamento di un "letter of intent" entre Stichting Monumentenfonds Aruba y e familia Veneranda pa e opcion pa compra di edificio den Wilhelminastraat nr 7, conoci como ex Papiamento Restaurant. E edificio ta keda dilanti Stadhuis y oficina di Algemene Rekenkamer Aruba (ex bibliotheek).

E firmamento a tuma luga riba e balcon na halto banda pabou di e edificio, na unda bo tin un bista riba tur e monumentonan den e vecindario. Presidente di Gerencia di Stichting Monumentenfonds Aruba, Sr. Roly Sint Jago y directora Sra. Anne Witsenburg, Sra. Landa Ras-Merryweather, representante di familia Veneranda conhuntamente cu Minister di Turismo, Transporte, Sector Primario y Cultura Sr. Otmar Oduber a firma e documentonan aki dilanti e herederonan di Veneranda y Machi Arends.

Prome cu firmamento

Prome cu e firmamento Sr. Ras-Merryweather a papia tocante e tempo Sra. a bida hunto cu su wela y tabata wak e carnaval pasa riba caminda ey dilanti y con e balcon a duna un bon bista riba klapchi durante Aña nobo. Sr. Ras-Merryweather tambe a papia over e deseo di su wela ta pa e edificio keda mantene pa Aruba. Minister Oduber a pone enfasis riba e historia di e edificio. Tambe e minister a

splica "e familia a duna dos condicion pa un bende-mento definitivo, e edificio mester keda conserva y e edificio mester wordo restaura na su estado original."

Restaura na forma original

Stichting Monumentenfonds Aruba ta hopi contento cu e posibilidad di por cumpra e cas aki. "E cas aki tin hopi balor cultural pa nos comunidad. Sigur e edificio aki lo wordo restaura na su forma original." E firmamento di un 'letter of intent' lo duna Monumentenfonds 4 luna pa realisa e cumpramento definitivo. "Si nos ta realisa e cumpramento definitivo nos lo restaura e edificio. E trayecto di restauracion lo tuma tempo. Tempo ta necesario pa studia e detayenan original, planea, haci un destaho publico etc." E familia di Veneranda y Machi Arends tambe tawata hopi emocionada "E intencion di bende-mento lo significa pa nos cu e



edificio lo wordo mantene pa e futuro y lo yuda bira un monumentonan bibo."

Historia di cas

E cas aki tin un historia largo. El a wordo construi mas o menos den aña 1936 door di e carpinte Dada Picus den estilo Latino neo barok. E estilo di e cas aki ta bin di Cartagena Colombia. Den e fachada tin tur e decoracionnan rond na halto. Na e rand di dak tin e baluster di beton. Tambe tin balcon como decoracion na e bentananan. E cura tambe ta traha cu yen di decoracion di beton. Paden tambe bo ta weita e mosaiconan di vloer original. Tin hopi parti paden cu a wordo kibra pa cambianan cu bin despues.

E residencia aki tin dos piso. Esun abou tabata wordo uza como luga pa warda cos y principalmente tabata tin un regenbak pa warda awa di yobida. Riba e prome piso ta e luga unda e familia tawata biba. Riba e prome piso tambe tawata tin e negoshi di "Super Ijscream" di Machi Arends, tambe e floresteria di su yiu muhe "oncha's Flower Shop"

Den añanan 90 e cas aki a wordo converti den "Papiamento Restaurant". Despues e luga a keda hopi tempo cera. Durante añanan a surgi varios candela cu a haci hopi daño na e interior di e edificio. Bentananan a wordo kita y a pega bloki na su luga. Awor e por wordo restaura na forma original pa wordo conserva pa nos y nos futuro generacion. □